

Hormati nilai eksklusif darjah kebesaran

MENGIKUT Perlembagaan Persekutuan, Malaysia mempunyai sembilan raja-raja Melayu dan empat Yang Dipertua Negeri. Kesemuanya merupakan anggota Majlis Raja-Raja dan hanya anggota majlis itu yang berhak memberi darjah kebesaran dan gelaran di negara ini.

Pengiktirafan tersebut lazim diberikan kepada individu yang banyak berjasa kepada negeri atau negara. Begitupun, ia bukan proses yang mudah. Terdapat jawatankuasa tertentu yang menilai kelayakan penerima darjah kebesaran ini terlebih dulu sebelum seseorang boleh bergelar Tun, Tan Sri, Datuk Seri, Datuk dan sebagainya.

Pakar sejarah, Prof. Datuk Dr. Ramlah Adam, berkata pembeiran darjah kebesaran dan gelaran kehormat merupakan tradisi yang diamalkan sejak zaman kerajaan Kesultanan Melayu Melaka.

Katanya, ketika itu, sultan menganugerahkan pembesar tempatan dengan gelaran seperti Datuk Bendahara atau Datuk Laksamana bertujuan menghargai sumbangan mereka.

"Tradisi itu berterusan sehingga sekarang di mana kuasa memberi darjah kebesaran pada peringkat negeri terletak di bawah sultan, raja atau Yang Dipertua Negeri manakala pada peringkat Persekutuan oleh Yang di-Pertuan Agong," katanya.

Bagaimanapun, sejak akhir-akhir ini timbul polemik dalam kalangan masyarakat berikutnya terdapat segelintir penerima darjah kebesaran telah mempermalukan kelakuan yang amat mengaibkan. Malah, ada antara mereka ini telah dituduh melakukan jenayah.

Terbaru, insiden tiga anggota Jabatan Sukarelawan Malaysia (Rela) cedera dibelasah oleh seorang individu bergelar Datuk Seri ketika bertugas di sebuah lokasi di ibu negara.

Berita itu pantas meraih perhatian pelbagai pihak termasuk Timbalan Perdana Menteri, Datuk Seri Ahmad Zahid Hamidi. Ketika merasmikan Hari Keluarga Kementerian Dalam Negeri Tahun 2017 di Maktab Penjara Malaysia baru-baru ini beliau memberitahu sesiapa sahaja di negara ini terpakluk di bawah undang-undang.

Katanya, gelaran atau pangkat bukan merupakan lesen untuk mengambil tindakan kekerasan terhadap orang lain terutamanya petugas beruniform.



Presiden Majlis Datuk Persekutuan Malaysia (MDPM), Tan Sri Danny Oii juga tidak

terkecuali menyelar tindakan itu. Memetik

kenyataannya pada satu sidang akhbar baru-baru ini, Danny mencadangkan supaya anugerah dan darjah kebesaran yang diberikan kepada seseorang individu ditarik balik jika mereka terbabit dalam kes jenayah.

Katanya, gelaran itu satu penghormatan dan mereka sepatutnya tidak mencemari pengiktirafan itu dengan sesuatu yang memalukan.

"Seseorang yang dianugerah gelaran sepatutnya menghormati orang lain, termasuk pasukan beruniform yang sedang melaksanakan tanggungjawab mereka.

"Kita harap gelaran mana-mana individu yang terlibat dalam kes jenayah ditarik tanpa mengambil kira status Tan Sri atau Datuk Seri," katanya.

Nada sama turut disuarakan aktivis masyarakat terkenal, Tan Sri Lee Lam Thye, 71, yang mengakui kecewa dengan insiden berkenaan. Katanya, pemberian gelaran kebesaran merupakan satu amanah dan individu yang menerimanya perlu menjadi contoh dan teladan yang baik kepada masyarakat.

Mengambil diri beliau sebagai contoh, Lam Thye memberitahu

beliau menerima gelaran Datuk dari negeri Perak pada tahun 1995 selepas bersara daripada politik.

"Saya sudah terlibat dalam kerja-kerja kebajikan dan kesiaran sejak dari muda namun hanya ketika berusia 49 tahun barulah usaha dan bakti saya diiktiraf. Gelaran itu juga tidak menyebabkan saya berhenti berkhidmat kepada masyarakat.

"Siapa sangka selepas itu rezeki saya terus mencurah-curah apabila menerima darjah kebesaran daripada beberapa negeri lain termasuk terbaharu, Datuk Seri Panglima dari negeri Sabah pada 2012.

"Apa yang ingin saya buktikan ialah sekiranya kita sentiasa ikhlas bekerja untuk masyarakat dan negara maka pengiktirafan itu akan datang tanpa perlu dicari," katanya yang kini berada di Pulau Pinang untuk membantu mangsa banjir di sana.

Sementara itu, Pensyarah Psikologi Sosial Universiti Putra Malaysia, Prof. Madya Dr. Ma'arof Redzuan berkata, secara fisiologinya manusia mencari tiga perkara dalam hidup iaitu ekonomi, kuasa dan kemegahan.

"Sebagai contoh, pemberian darjah kebesaran dari segi positifnya merupakan pengiktirafan kepada individu atas baktinya.

"Bagaimanapun, apabila pengiktirafan itu bertukar menjadi kemegahan maka ia membentuk ego yang menyebabkan seseorang itu memandang rendah kepada orang lain. Ego yang tidak dikawal ini menyebabkan mereka boleh bertindak sesuka hati atau melanggar undang-undang termasuk seperti kes yang terjadi baru-baru ini," katanya.

ENJIT-ENJIT SEMUT

Kereta hang dak tenggelam
ayaq bah ka Zainol?

Cheq tak kisah kereta cheq
tenggelam, jangan kedai
nasik kandaq ni tenggelam
sudah! Kalu tak pekena nasik
kandaq ni badan rasa
mengeletaq no!

